

von Wulf Wager

PolitExit



Schad, dass so viele Rattafänger geit, wo d' Leut ohne nochzomdenka henterherlaufat.

Großbritannien zum Beispiel. Die Engländer hend knapp, aber mit ra Mehrheit entschieda, aus dr EU auszomtreta. Isch en Ordnung aus meira Sicht, denn dene Engländer hat mr lang gnuag Extrasüppla kocht ond da Zucker en da Arsch blosa. Aber

die ganze Wortführer von dem Brexit hend sich jetzat Mirnixdirnix aus em Staub gmacht. Feige Hond, dia koi Verantwortung für den Brand, den se azündelt hend, übenemma wella. Brexit, des isch wie After Eight: Des hot vrpackt irgendwie geiler ausgsäha, man merkt erscht noch em Probiera, wia mies des isch ond s' hot obskurerweis emmer no Befürworter.

Dia wellat jo erscht em Herbst da Austritt erklära. Wenigschtens hot die englische Fußballmannschaft den EU-Austritt sofort vollzoga. En schöner Witz kursiert grad: Wieviel Engländer braucht mr zom a Glühbirn wechsla? Koin. Die ziagat oifach aus em Haus aus.

Ähnlich isch des bei der AFD. Der Haufa von verruckte RechtsPOPulischta isch jo jetzt vollends vrstritta. Em bada-württabergischa Landtag hot sich jetzt die Mehrheit aus dr Fraktion vrabschiedet ond a AFafd gründet. Leutla, des isch gwieß koi Alternative für Deutschland, des send Rattafänger ond Brandstifter ohne Moral ond Verantwortung. Dia Spinner ghörat ganz gwieß en koi Parlament. Wär super, wenn die au bald aus em Parlament ausziaga dädat, so wie vorher scho die Republikaner ond die Pirata. Dia hot au koi Mensch braucht. AFD-Wähler ka mr übrigens net pauschal für dumm erklära. Manche send oifach bloß net bsonders intelligent...

Bis näggschd Woch
Ihr

A handwritten signature in black ink, appearing to read 'Wager', written over a large checkmark.

Wulf Wager

Alle Kolumnen zum Nachlesen unter: www.woascht.de